

Tico Croes ta mira preguntanan como maniobra pa scondi acusacionnan contra Ministro

Hernandez a crea cortina di huma pa ministro

ORANJESTAD(AAN)--

"Mi ta contra tur tipo di Justicia di Clase. Pesey mi ta sumamente preocupa cu e acusacionnan cu a worde lanza contra Ministro di Justicia, Hendrik Croes. Pasobra e acusacionnan aki ta crea e impresion cu Ministro di Justicia a introduci Justicia di Clase na Aruba." Di e forma aki e Miembro di Staten pa AVP, Tico Croes, a reacciona ariba e serie di preguntanan di Raymond

Hernandez, Miembro di Parlamento pa MEP.

Tico Croes a duna di conoce cu tras e preguntanan di Hernandez, mester busca e intencion, cu probablemente ta pa defende Ministro Croes, creando un cortina di huma entorno e acusacionnan serio, cu a worde lanza contra e Ministro di Justicia.

E Miembro di Staten pa AVP no por scapa di e impresion, cu

Raymond Hernandez a usa e preguntanan encunto e caso cu Juez a atende entorno e viahe di Van Wijland pa Curacao, pa asina haya un cortina di huma rond e Ministro di Justicia, cu mester duna splicacion awor pa e acusacionnan serio cu Van Wijland a presenta den sala di Corte.

Tico Croes a mostra cu Raymond Hernandez no mester pensa cu e biah a aki por bolbe crea un ambiente den Staten pa

evita cu e Ministro di Justicia por sali glorioso di acusacionnan serio, sin cu e asuntonan aki ta worde investiga manera mester ta. Pasobra si di berdad Raymond Hernandez tin miedo

di Justicia di Clase e mester comprende cu Justicia di Clase ta cuminsa ora un Ministro dicidi ariba su mes si un persona ta keda deteni o ta haya libertad.

Pa AVP ta sumamente importante pa awor keda determina kico a pasa den seno di Mini-

sterio Publico y con un persona deteni pa droga, casi a haya libertad si no tabata pa actuacion di Van Wijland.

Tico Croes a mostra cu e momento pa yega pa aclarea sucesonan entorno di Justicia y den esaki ningun hende por scapa. E Ministro di Justicia tambe lo mester responde y ningun cortina di huma por bay yude pasobra e asunto ta demasiado serio pa e por worde scondi cu cualquier posible colaboracion politico.